

**Mayo 25, 2014: Ika-unom nga Dominggo sa Pagkabanhaw**

**Dugukan: Ang Simbahan sa Kabus, pinaagi sa Gagmayng Simbahanong Katilingban, makahatag ug saksi sa tinuod nga pagkamasinugtanon tungod sa gugma ug dili tungod sa balaod, kon ang iyang mga pangulo ug ang mga tumutuo nagkahiusa sa pagsunod sa mga tinguha sa Gingharian sa Diyos!**

**Katesismo:**

Sa mapadayonong pagtagamtam sa kalipay sa Pagkabanhaw tungod sa bag-ong kinabuhi nga gituga kanato sa atong Nabanhawng Ginoo, ipadayon usab nato ang pagpamalandong bahin sa gimithing us aka Simbahang Nabag-o. Ang iyang sukaranan mao si Jesus ug ang iyang mensahe bahin sa Gingharian sa Diyos. Matud pa sa PKP-II:

## **“2. Ang Pagsangyaw sa Gingharian sa Diyos usa ka Gasá**

**(39)** Ang nindot nga balita alang sa mga kabus Gingharian sa Diyos. Gisangyaw ni Jesus ang Gingharian isip gasa sa Diyos. Usa kini ka liso nga sa hilom gisabwag. Ang liso sa paghari sa Diyos, siya nga gitawag ni Jesus sa kinasingkasing ‘Abba’, Amahan, ug gipaila nga ‘mobati sa mga panginahanglan ug kasakitan sa mata’g tawo. Amahan siya nga puno sa gugma ug kalooy, nga mopasaylo ug gawasnong mohatag ug mga tubag kanilang mangayo niini.’ Ang tanan gidapit ngadto sa Gingharian nga dili tungod kay takus. Ang Gingharian sa Diyos gasa sa kaluwasan. Halad kini sa kapasayloan sa mga makasasala. Kini ang kinabuhing walay katapusan. Ang Gingharian usa ka bangkita, usa ka panaghiusa sa talad-kan-anan, usa ka malipayong pakighiusa sa Ginoo ug sa isigkatawo. Sa pagsugod sa paghari sa Diyos dinhi sa kalibutan, nagsugod usab pagkabungkag ang yawan-ong paghari sa sala ug kamatayon.

## **3. Anaa Diha ni Jesus**

**(40)** Apan ang Gingharian sa Diyos ania na dinhi sa atong kalibutan. Pinaagi sa pulong ug buhat ni Jesus; diha sa persona ni Jesus. Sa dihang giproklama ni Jesus ang pulong sa Iyang Amahan, miabot ang Gingharian. Sa iyang pagpalagpot sa mga demonyo, miabot ang Gingharian sa Diyos. Ang iyang pakighiusa sa talad-kan-anan uban sa mga makasasala nagbugtaw sa bangkiteng walay katapusan sa Gingharian.

**(41)** Ang iyang kamatayon ug pagkabanhaw maoy mahukmanong kadaugan sa Gingharian sa Diyos dinhi sa kalibutan. Gibayaw siya gikan sa yuta ug gidapit niya ang tanan ngadto kaniya isip Ginoo niadtong mga anaa sa langit, sa yuta, ug ilawom sa yuta. Diha kang Jesus, ang gahum sa Diyos mibutho nganhi kanato, ming-ulbo sa atong kasaysayan. Sa pagkatinuod, ‘Ang Gingharian sa Diyos ... una sa tanan usa ka persona nga may nawong ug pangalan ni Jesus nga taga-Nasaret, ang larawan sa di-makita nga Diyos’.

Mahinungdanon kaayo nga pamalandongan nato kining identidad ni Jesus isip Gisakit nga Sulugoon nga maoy nagpalingkawas ug ang iyang mensahe sa Gingharian sa Diyos. Personal, binagsa, isip pamilya ug isip BEC, ilabi na uban sa inyong mga pari ug mga relihiyoso, pamalandongan ug panaghisgutan nga hiniusa kon unsay kahulugan niining identidad ni Jesus ug ang iyang mensahe sa Gingharian alang kaninyo karon, sa kasamtangang panahon. Giunsa man niini pagka-anaa diha sa inyong GSK?

---

## **Rito sa Pagsugod**

P: Sa ngalan sa Amahan ug sa Anak ug sa Espiritu Santo.

K: Amen.

P: Ang Kalinaw sa Nabanhawng Ginoo maanaa kaninyo.

K: Maanaa usab kanimo.

**Pag-abli ug Pag-abi-abi:**

Mga minahal kong mga igsoon: ipadayon nato ang pagtagamtam sa kalipay sa Pagkabanhaw ug sa bag-ong kinabuhi nga gigasa kanato sa atong Nabanhawng Ginoo. Iampo nato ang tagsatagsa nga unta magdinasigay kta ug magtinabangay aron atong puy-an ang mga mithi sa Gingharian sa Diyos ug dili ang mga idolo sa merkado ug ang mga gamhanan sa yuta.

**Akto sa Paghinulsol:**

P: Mga igsoon, ato pangayoon karon sa Diyos ang iyang pasaylo sa atong mga sala, aron mahimo kitang takus sa pagsaulog niining mga balaang misteryo.

P: Ginoo, pasayloa kami kay sa makadaghang higayon mibatok kami kanimo. Ginoo, kaloy-i kami.

K: Ginoo, kaloy-i kami.

P: Kristo, tabangi kami sa panahon sa mga duda, kawalay pagtoo ug kagahi sa kasingkasing. Kristo, kaloy-i kami.

K: Kristo, kaloy-i kami.

P: Ginoo, ipakita kanunay kanamo ang dalan balik nganha kanimo ug sa Amahan. Ginoo, kaloy-i kami.

K: Ginoo, kaloy-i kami.

P: Kaloy-an unta kita sa Dios...ngadto sa kinabuhing dayon.

K: Amen.

**Himaya sa Diyos didto sa langit...**

---

**Kolekta:**

P: Mag-ampo kita: Ihatag, labawng makagagahum nga Diyos, nga amo untag saulugon sa kinasingkasing nga debosyon kining mga adlaw sa kalipay, sa pagpasidungog sa nabanhawng Ginoo, ug nga kadtong ang amo untag mapuy-an pag-usab pinaagi sa paghinumdom, amo usab untag mahuptan sa among mga gipanghimo. Pinaagi sa among Ginoong Jesukristo, imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

K: Amen.

---

**Liturhiya sa Pulong:**

**L: Ang Unang Pagbasa gikan sa Mga Buhat sa mga Apostoles (Buhat 6:1-7):**

(Basahon gikan sa Kasulatan)

L: Ang Pulong sa Ginoo.

T: Salamat sa Dios.

### **Komentaryo sa Mga Buhat 8:5-8,14-17**

Ang konteksto niining tekstoha maong ang piling paggukod sa mga Kristohanon. Ang mga helenistang Kristyano lang ang gipanggukod, mao nga kinahanglan silang mobiya. Buot ipakita ni Lukas nga ang pag-eskapo sa pagpanggukod maoy nakapahimo sa mga helenistang Kristohanon nga mga kauban ug kasangkapan sa Espiritu Santo sa pagsangyaw sa nindot nga balita! Si Felipe, usa sa mga 7 ka mga helenistang Kristyano nga napili pag-atiman sa mga byuda, gipadala ngadto sa Samaria, nga tingali niining panahona nahimong tunga-pagano, tunga-mingsalikway sa pagtoo, ug puno sa mga relihiyong sinagolsagol. Ang iyang kalamposan sa pagsangyaw nakatukmod sa solidaridad gikan sa mga punuan sa Simbahan. Sa diwa sa solidaridad o pakighiusa, mibiya sa Jerusalem sila si Pedro ug Juan aron ubanan si Felipe ug ikompirma ang iyang mga buhat-misyonero ug ang katilingbang natukod. Ang Espiritu Santo mao ang tinubdan sa panaghiusa, sa kalipay ug sa Kristohanong kinabuhi.

### **Salmo Responsoryo: Sal 66:1-3, 4-5, 6-7, 16, 20**

(Basahon gikan sa Kasulatan)

### **Komentaryo sa Sal 66**

Salmo kini sa mahimayaong pagdayeg ug pasalamat. Ang mga katingalahang buhat sa Diyos sa mga binuhat ug sa kasaysayan sa tawo giasoy dinhi. Ag karon giangkon kini sa mag-aawit nga iyahang personal nga kasinatian nga gitubag sa Diyos ang iyang pag-ampo, pinaagi sa iyang kalooy ug mga buhat nga makaluwas.

### **L: Ang Ikaduhang Pagbasa Gikan sa Unang Sulat ni San Pedro: (1 Ped 3:15-18)**

(Basahon gikan sa Kasulatan).

L: Ang Pulong sa Ginoo.

T: Salamat sa Dios.

### **Komentaryo sa 1 Ped 3:15-18**

Gibalikan ni Pedro ang paborito niyang dugukan: ang pagpasakit alang sa pagtoo. Sa mga kasinatian sa pagpadaplin, pagtamay ug paggukod sa Kristohanong katilingban, gidasig ni Pedro ang katilingban nga maglig-on sa ilang baruganan: ayaw kahadloki ang pagpuyo ni Kristo sa inyong kasingkasing. Mahimo nga ang inyong pagsaksi taliwala sa pagpanggukod ug pagtamay mao man hinoon ang makahatag ug grasya sa manggugukod mismo: aron makalaom sila sa inyong gilauman! Ang pagpasakit tungod sa buhat nga maayo mas gipalabi kanunay kay sa pagbuhat ug dautan! Ang gamut-hinungdan niining pagdasig ni Pedro mao ang panig-ingnan ni Jesus: ang iyang kamatayon ug pagkabanhaw naghatud ug kaluwasan sa tanan.

### **Berso sa Alleluya:**

**T: Aleluya, aleuya.** Kinsa gani kadtong nahigugma kanako nagabuhat sa akong pulong, matud pa sa Ginoo, ug ang akong Amahan mohigugma kaniya ug kami moanha kaniya! **T: Aleluya, aleluya.**

### **Ebanghelyo**

P: Ang Ginoo maanaa kaninyo.

K: Maanaa usab kanimo.

**P: Ang Santos nga Ebanghelyo Sumala ni San Juan (Juan 14:15-21)**

(Basahon gikan sa Kasulatan)

K: Himayaon ikaw, O Ginoo.

P: Ang Ebanghelyo sa Ginoo.

K: Dayegon ikaw, O Kristo.

**Komentaryo sa Juan 14:15-21**

Gipakita ni Juan ang halawom nga diwa sa mga sugo: ang gugma mao ang sukaranan sa pagtuman sa sugo. Wala kita mosugot gumikan sa sugo sa balaod; hinonoa, misugot kita isip timailhan sa gugma. Dinhi niining diwa sa mahigugmaong pagtuman ug sa masinugtanong gugma nga si Jesus mihatag sa iyang unang saad: ang gasa sa Espiritu mao ang iyang bag-ong pamaagi sa pagkaanaa uban kanato nga iyang giangkong iyaha – mga matinumang managhigumaay, mga mahigugmaong katawhan. Mao gani nga sa umaabot ugma, sa iyang pagbiya, kita sa kasaysayan, dinhi sa Simbahan, dili niya biyaang mga ilo. Kay uban kanato ang iyang Espiritu, ang Simbahan sa kasaysayan, naghiusa, naglig-on ug nagtultol sa atong katilingban taliwala sa atong mga pagkigbisog padulong sa atong padulngan. Mao kini ang unang yugto sa pag-andam sa Simbahan sa mga pakigbisog nga umaabot, batok sa kalibutan ug sa mga pwersa sa kalibutan nga dili makaamgo sa lihok sa Espiritu. Niining maong pakigbisog, ang Amahan ug Anak ug ang tumutuo nagkahiusa. Lahi sa pamaagi sa kalibutanong pagpuyo, ang pagtuman sa balaod ni Jesus ekspresyon sa paghigugam ug naghambin sa alternatibong pamaagi sa pagpuyo: panaghiusa sa Diyos ug sa mata'g usa.

**Wali: Ang Simbahan sa Kabus, pinaagi sa Gagmayng Simbahanong Katilingban, makahatag ug saksi sa tinuod nga pagkamasinugtanon tungod sa gugma ug dili tungod sa balaod, kon ang iyang mga pangulo ug ang mga tumutuo nagkahiusa sa pagsunod sa mga tinguha sa Gingharian sa Diyos!**

Sumada sa mga Mensahe sa Dominggo:	Konkretong kahimtang sa mga Kabus:	Pamalandong/Hagit/Tawag:
Ang Simbahan sa Kabus, pinaagi sa Gagmayng Simbahanong Katilingban, makahatag ug saksi sa tinuod nga pagkamasinugtanon tungod sa gugma ug dili tungod sa balaod, kon ang iyang mga pangulo ug ang mga tumutuo nagkahiusa sa pagsunod sa mga tinguha sa Gingharian sa Diyos!	Sa inyong GSK, adunay bay mga balaod ug regulasyon nga namugos ginamti ang mga sakramento sa pagsilot? Ang inyong mga pari ba ug mga relihiyoso mokuyog ba kaninyo sa inyong mga pamalandong ug kalihokan isip GSK? Aduna bay kalipay, kalinaw ug kahiusa sa inyong GSK bisan pa sa mga kontradiksyon ug bangi ug mga kakulang sa pagsinabtanay?	Taliwala sa katin-aw sa balaod ug sa mga gikinahanglan sa gugma ug kalooy, ang Kristohanon mosunod gayod sa gugma ug kalooy uban sa risgo sa pagpasakit, pagkabilanggo ug kamatayon. Ang kalig-on sa pagtoo, bisan pa sa kasakit, pagkabilanggo ug kamatayon, grasya man sa mga manggugukod.

**Akto sa Pagtoo:**

### **Katilingbanong Pag-ampo:**

P: Mga hinigugma kong mga igsoon, malipayon kitang mohangyo sa atong Amahan ug mga grasya nga atong gikinahanglan aron sa paglig-on sa atong pagtoo sa pagtuman sa gugma ug dili tungod sa balaod. Sa mata'g pag-ampo, kita motubag: Ginoo, tabangi kami nga mahimong katawhan sa paglaum sa imong gingharian.

T: Ginoo, tabangi kami nga mahimong katawhan sa paglaum sa imong gingharian.

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagtudlo kanato sa dalan sa pagkamasinugtanon isip bunga sa paghigugma, ug dili sa kahadlok tungod sa mapugsanong gahum sa balaod. Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ila untang ipadayon ang pagpanalipud sa kagawasan sa konsiyensya sa matag tawo alang sa gasa sa Ginharian, batok sa mga balaod nga nagdapig sa mga adunahan ug mga may gahom. Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang ipatigbabaw ug panalipdan ang mga katungod ug kaayohan sa tanang mga binilanggo nga nasilotan tungod sa ilang mga krimen, ug ilang untang pagawason ang tanang mga binilanggong politikal ug ang tanang mga binilanggo sa konsiyensya. Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

L: Alang kanatong tanan, mga lumulupyong sa kalibutan ug sakop sa kalangitan: nga magdinasigay ug magtinabangay kit asa atong pagkaplag sa presensya sa Ginharian sa Diyos nga ania na kanato, sa pagsalikway sa indibiduwalismo ug kahakog nga nagpalibot niini ug nga ilisdan ang mga gahum ug mga balaod nga nakakorap niini. Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (mohilum kadiyot) .... Mag-ampo kita sa Ginoo.

T: Ginoo, tabangi kami nga mahimong katawhan sa paglaum sa imong gingharian.

P: Ginoo, mao kini ang mga pag-ampo nga among gihalad kanimo karon. Nangaliyopo kami kanimo nga lig-onon mo ang among pagtoo, paglaum ug paghigugma samtang nagasaksi kami sa imong Ginghamarian dinhi sa kalibotan. Kini among gipangayo pinaagi ni Kristo atong Ginoo.

T: Amen.

---

### **Liturhiya sa Eukaristiya:**

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.'

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

### **Pag-ampo sa Paghalad:**

P: Ang among mga pag-ampo mosaka unta diha kanimo, O Ginoo, uban sa mga halad sa sakripisyo, aron nga, nadalisay sa imong grasya, maumol kami subay sa mga misteryo sa imong gugmang labawng gamhanan. Pinaagi ni Kristo among Ginoo.

K: Amen.

---

### **Pag-ampo sa Eukaristiya**

#### **Prepasyo:**

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit apan ilabi na gayud niining panahona, O Ginoo, nga dayegon ikaw sa tumang paghimaya, kay si Kristo nga among Pasko nahalad na man.

Kay, sa pagkalaglag sa karaang kahimtang, ang unibersong nahitumpawak nabag-o na, ug ang kaligdong sa kinabuhi nahiuli na kanato diha ni Kristo.

Busa, puno sa kalipay sa pasko sa pagkabanhaw, ang mata'g yuta, ang mata'g katawhan nagadayeg sa imong himaya ug bisan gani ang mga gahum sa kalangitan, uban sa mga panon sa mga anghel, nagadungan sa pag-awit sa walay katapusan imno sa imong himaya, sa ilang pag-ingon:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

**K: Among gisangyaw ang imong Kamatayon, O Ginoo, ug among gipadayag ang imong Pagkabanhaw hangtud sa imong pagbalik pag-usab.**

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pagpangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubus.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlawa ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: 'Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang ginharian/ ug ang gahom ug ang himaya/ hangtod sa kahangturan.

P: Ginoong JesuKristo, nag-ingon ka sa imong mga Apostoles, "Ang kalinaw ibilin ko kaninyo, ang akong kalinaw ihatag ko kaninyo." Ayaw tan-awa ang among mga sala, kondili ang pagsalig sa imong Simbahan

ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

P: Kordero sa Dios

K; nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

---

#### **Pag-ampo Human sa Komunyon:**

P: Mag-ampo kita: Labawng makagagahum ug buhi kanunay nga Diyos, kinsa nagpabalik kanamo ngadto sa kinabuhing tunhay diha sa Pagkabanhaw ni Kristo, padagahana dinhi kanamo, naga-ampo kami, ang mga bunga sa Sakramento Paskuwal ug ibubo nganhi sa among mga kasingkasing ang kusog niining pagkaong makaluwas. Pinaagi ni Kristo among Ginoo.

K: Amen.

---

#### **Katapusang Panalangin:**

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Ihatag ang pasaylo ug kalinaw, O Ginoo, naga-ampo kami, nganhi sa imong katawhan, aron sila malinisan sa tanang kalapasan ug moalagad kanimo sa mga kasingkasing nga malinawon. Pinaagi ni Kristo among Ginoo.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakaw kamo diha sa kalinaw.



K: Salamat sa Dios.